

AWIG - AWIG DESA ADAT DUDA



**DESA ADAT DUDA
SELAT - KARANGASEM**

1994

PIDAGING

MAKA BANTANG AWIG - AWIG DESA ADAT DUDA

	Widang
MURDHA CITTA	1
SARGA I. ARAN LAN WEWIDANGAN	2
SARGA II. PETITIS LAN PAMIKUKUH	2
SARGA III. SUKERTA LAN TATA KRAMA	3
Palet 1 : Indik Krama	3
Palet 2. : Indik Prajuru Desa Adat	4
Palet 3. : Indik Sangkepan lan Paruman	5
Palet 4. : Indik Kulkul	6
Palet 5. : Indik Druwen Desa	7
Palet 6. : Indik Sukerta Pamitegep	8
Kaping I : Karang, Tegal Lan Bangket	8
Kaping II : Kekayonan	9
Kaping III : Wewangunan	9
Kaping IV : Wewalungan	10
Kaping V : Indik Baya	10
Kaping VI : Indik Rerampagan lan Ngaasin	11
Palet 7 : Indik Panyanggran Banjar lan Sekaa Truna	11
SARGA IV. SUKERTA TATA AGAMA	12
Palet 1. : Indik Kahyangan Desa	12
Palet 2. : Indik Dewa Yadnya	14
Palet 3. : Indik Resi Yadnya	17
Palet 4. : Indik Pitra Yadnya	17
Palet 5. : Indik Manusa Yadnya	20
Palet 6. : Indik Buta Yadnya	20
SARGA V. SUKERTA TATA PAWONGAN	21
Palet 1. : Indik Pawiwahan	21
Palet 2. : Indik Palas Marabian	24
Palet 3. : Swadarmaning Balu	24
Palet 4. : Indik Sentana	25
Palet 5. : Indik Waris	25
SARGA VI. WICARA LAN PAMIDANDA	27
Palet 1. : Indik Wicara	27
Palet 2. : Indik Pamidanda	28
SARGA VII. NGUWAH - NGUWUHIN AWIG - AWIG	29
SARGA VIII. PAMUPUT	29
Lampiran I : SUSUNAN PANITIA PERUMUS PENULISAN AWIG - AWIG DESA ADAT DUDA	32
Lampiran II : TEAM PENYEMPURNAAN / PENELITI AWIG - AWIG DESA ADAT KABUPATEN DAERAH TINGKAT II KARANGASEM.....	34

MURDHA – CITTA

" Om Awignamastu Nammo Siddhem "

Manut linging Sastra Agama, Desane
wiakti wantah maka anggan Buana Agung
saha Pawongannia pinaka Buana Alit.

Kawentenan Desane pinaka Buana Agung,
kawangun antuk sane kasinaggeh TRIHITA
KARANA.

Melarapan sangkaning Asung Kertha
Wara Nugraha Ida Sang Hyang Prama
Wisesa maka miwah pasewecan Ida Betara
- betari sinamian, ring paruman mami krama
Desa Adat Duda gilik saguluk cita nirmala
ngeraremin Awig - awig maka sepat siku -
siku pamineh wastu kasidan prayojanan
mami kabeh presama angidep miwah
amagehaken kadi tata gamaning Awig -
awig iki.

SARGA I

ARAN LAN WEWIDANGAN

Paos 1

- (1) Desa Adat puniki mawasta **DESA ADAT DUDA**
- (2) Jebag kakuub wewidangannia mawasta asta desa, luire
 - a. Tepi Wetan (kangin) Desa Adat Putung.
 - n. Tepi Gencan (kelod kangin) Desa Adat Patch.
 - c. Tepi Kidul (kelod) Desa Adat Telengan.
 - r. Tepi Neriti (kelod kauh) Desa Adat Padang Tunggal.
 - k. Tepi Kulon (kauh) Desa Adat Selat.
 - d. Tepi Wayabaya (kaja kauh) Desa Adat Geriana Kauh.
 - t. Tepi Lor (kaja) Desa Adat Karangsari.
 - s. Tepi Ersania (kaja kangin) Desa Adat Sibetan.
- (3) Desa Adat Duda puniki kapikukuhin tur kasanggra antuk Banjar Patas lan Desa Pitulikur.

Paos 2

Manut Tri Mandalaning Desa kakuub wewidangan pinara tiga, luire :

- a. Utama Mandala, linggih Kahyangan.
- n. Madya Mandala, makadi pupulan karang paumahan lan telajakan Desa.
- c. Nista Mandala, makadi setra kalih tulak tanggul.

SARGA II

PETITIS LAN PAMIKUKUH

Paos 3

Desa Adat Duda ngamanggehang tur mikukuhin :

- a. Pancasila lan Undang - Undang Dasar 1945
- n. Tri Hita Karana manut ketatwaning Agama Hindu.

Paos 4

Desa Adat Duda ngamanggehang petitis, luire :

- a. Ngutamayang Tata Prawertine me Agama Hindu
- n. Ngerajegang Awig - awig muah pararem Desa Adat Duda maka pamikukuh pawongannia.
- c. Ngewibuhang pangeweruh lan pangupajiwa maka don sukerta sekala lan niskala.

SARGA III
SUKERTA LAN TATA KRAMA

Palet 1

Indik Krama

Paos 5

- (1) Sane kabaos Krama Desa inggih punika kulewarga sane me Agama Hindu tur sampun bulangkep.
- (2) Krama Desa Adat Duda manut^{*} pepalihan wenten tigang soroh, luire :
 - a. Krama Ngarep : Inggih punika krama sane sampun ngeranjing makrama Banjar Patus.
 - n. Krama Sesabu : Inggih punika krama sane durung utawi nenten makrama Banjar Patus.
 - c. Krama Tamiu : Inggih punika kulewarge sane mawiwit saking dura Desa turmaning sampun katrima dados krama.

Paos 6

- (1) Ngawit tedun dados Krama Desa Adat Duda, luire :
 - a. Enem sasih saking pawiwahane turmaning ngeranjing mabanjar patus
 - n. Jumenek magenah ring wewidangan Desa Adat Duda mawaneng enem sasih turmaning sampun katrima dados krama.
- (2) Krama sane mawali malih ke Desa Adat Duda sangkaning rahayu, patut tedun makrama Desa Adat Banjar Patus malih manut dresta.
- (3) Yan sangkaning tan rahayu, patut naur sehanan utang - utangnia saha nunas kaiwang-iwangan ring sangkepan Banjar Patus.

Paos 7

Swadarmaning Krama Desa Adat, kadi munggah ring sor puniki :

- (1) Indik tetegenan , luire :
 - a. Krama ngarep sane inucap ring paos 5 wiwit (2) aksara a keni ayahan utawi paturunan mamungkul
 - n. Krama Sesabu sajawaning keni ayahan utawi paturunan taler keni sesabu 5 (limang) gantang beras ngetahun rikala aci ring Pura Puseh.
 - c. Krama Tamiu kadi inucap ring paos 5 wiwit (2) aksara c keni panglaga 5 (limang) gantang beras ngetahun rikala aci Usaba kapat sajawaning sane magenah ring Banjar Bangbang Biaung.
 - r. Sehananing Krama Desa sane ninggal Desa sangkaning rahayu magenah ring dura Desa , kanton kaiket antuk Desa Adat Duda , patut ngaturang dana punia ke Desa Adat.
 - k. Swadarmaning krama siosan ring ayah - ayahan minekadi paturunan luire :
 - 1) Drede atuang ring Desa Adat.
 - 2) Tinut saturut ring sadaging Awig - awig, pasuara lan pararem.

- d. Nyarengin paruman Banjar minekadi Desa Adat.
- t. Polih leluputan manut wiguna.

(2) Indik petuas Krama, luire :

- a. Polih pasayuban ngamanggehang petitis.
- n. Sehananing wicaran nyane wenang kabaosin saha kaicen pamatut.

Paos 8

Wusan dados krama Desa Adat Duda riantukan :

- a. S e d a
- n. Sangkaning magingsir genah tur jumenek ring dura Desa
- c. Matilar saking Agama Hindu
- r. Macihna sungkan - sungkanan
- k. Sangkaning kaeladang riantukan setata murug Awig pasuara lan pararem
- d. Sangkaning nyada

Palet 2

Indik Prajuru Desa Adat

Paos 9

- (1) Desa Adat Duda puniki kaenterang antuk Prajuru Desa Adat
- (2) Prajuru Desa Adat Duda luire :
 - a. P a s e k
 - n. K e b a y a n
 - c. Penyarikan
- (3) Kelihan - kelihan Banjar Patus kasinanggeh petangan Prajuru Desa Adat.

Paos 10

- (1) Tata cara ngadegang Prajuru Desa Adat :
 - a Mawiwit saking ayahan ngarep utawi krama Banjar Patus.
 - n. Kadegang melarapan antuk kasudi ring sajeroning paruman Desa sanunggil lima warsa, tur dados kasudi malih.
- (2) Sane dados kadegang maka Prajuru Desa Adat Duda , Luire :
 - a. Nenten Cedangga.

- n. Wikan ngwacen lan nyurat aksara Bali utawi latin.
- c. Nenten macihna sungkan - sungkanan.
- r. Macihna nenten nahen malaksana corah.
- k. Tan gamia gamana.

Paos 11

Swadarmaning Prajuru Desa Adat Duda, luire :

- a. Ngenterang pamargin Awig - awig, pasuara miwah pararem.
- n. Nuntun Krama Desa ritepengan ngupadiang petitis.
- c. Nuntun miwah ngupesaksi Krama Desa rikala ngamargiang swadarmaning kahuripan
- r. Pinaka Duta Desa rikala nemuang babaos.
- k. Maosin miwah niwakang pamutus ring sehanan wicara sane metu ring Desa.

Paos 12

Patuas Prajuru Desa, luire :

- a. Luput sehananing wewijilan
- n. Polih olih - olihan manut pararem.
- c. Bukti - bukti Prajuru.

Paos 13

Prajuru Desa Adat Duda kagentosin riantukan :

- a. Keni bayapati (seda)
- n. Macihna sungkan - sungkanan .
- c. Sangkaning pinunas ngraga melarapan saking rahayu, risampun kalugrahin antuk paruman Desa .
- r. Macihna malaksana corah
- k. Pamutus pararem Desa melarapan macihna mamurug awig - awig.

Palet 3

Indik Sangkepan lan Paruman

Paos 14

(1) Bacakan sangkepan luire :

- a. Sangkepan Prajuru Desa Adat.

- n. Sangkepan kelihan Banjar Patus.
- c. Sangkepan Desa Pitulikur.
- r. Sangkepan Prajuru Desa Pitulikur lan Kelihan Banjar Patus
- k. Paruman Desa.

(2) Panemayan raina sangkepan ring Desa Adat Duda, luire :

- a. Sangkepan Pprajuru Desa Adat Duda kawentenang sanistania ngasasih apisan miwah manut wiguna
- n. Sangkepan Kelihan Banjar Patus kawentenang sanunggil ngasasih, nemu Buda Kliwon , kalih manut kabuatan
- c. Sangkepan Desa Pitulikur kawentenang sanunggil ngasasih, tanggal ping dasa kalih ping solas nemu dora utawi waya.
- r. Paruman Desa kawentenang ngetahun.
- k. Paruman wiadin sangkepan kengin kawentenang napad gatekala.

Paos 15

- (1) Sangkepan lan paparuman kaenter olih Prajuru Desa Adat.
- (2) Pamargin sangkepan lan paparuman kaenter olih Prajuru Desa Adat kadi munggah ring sor puniki :
 - a. Matengeran suaran kulkul, sajawaning sangkepan Prajuru Desa Adat.
 - n. Krama Desa mangda mabusana Adat jangkep, prade kapurug kadanda agantang beras sahe tan dados nyarengin sangkepan inucap
 - c. Sadurung paparuman utawi sangkepan kakawitin, patut mapiuning ring Bagawan Penyarikan maduluran antuk canang pangraos .
 - r. Ngawit macak sep - sepan saha riwasannia macak krama sane nora tedun.

Paos 16

- (1) Pamutus babaos kaaptiang mangda gilik saguluk pacang ngupadiang petitis.
- (2) Yan tan sida gilik saguluk, suara sane makehan pinaka pamutus.

Paos 17

- (1) Ring sajeroning sangkepan, Prajuru Desa Adat patut ngawedar sapamargin pangenter Desa ngeninin :
 - a. Indik druwen Desa, sulur arta brana mwang dedosan.
 - n. Pangerencana mwang usaha Desa.
 - c. Pamutus wicara mwang tatepasan.
 - r. Ngelimbakang sehananing pabuat sang amawarat.
 - k. Munjuk lungsuring pakraman utawi ayah - ayahan.
- (2) Nyejerang sehananing pasuara saha nitenin daging sangkepan desa
- (3) Pamutus pangerencana sane melarapan pasuara Desa wenang kamargiang turmaning kasinanggeh pasuara Desa.

Palet 4

Indik Kulkul

Paos 18

Kulkul masuara nganutin Tri Brata Sandhi luire :

- a. Dharma : kulkul masuara nganutin upacara Agama
- n. Sima : kulkul masuara nganutin adat sane kamanggehang
- c. Laksana : kulkul masuara nganutin sawatek pakaryan sane kalaksanayang antuk Desa / Banjar.

Paos 19

- (1) Kulkul ring Desa Adat Duda, luire :
 - a. Kulkul Desa.
 - n. Kulkul Pura - pura.
 - c. Kulkul Banjar
 - r. Kulkul Pemaksan
 - k. Kulkul Sekaa -sekaa siosan.
- (2) Tatepakan tabuh kulkul masiosan manut tetujon, tatepakan soang - soang sekadi ring sor:
 - a. Tetenger wali.
 - n. Tetenger tedun sangkep utawi paruman lan ngayah.
 - c. Tetenger kapanca baya.
- (3) Pepalihan tatepakan suaran kulkul kapanca baya luire :
 - a. Tatepakan suaran kulkul bayapati lan baya arta tigang tuludan bulus.
 - n. Tatepakan suaran kulkul geni baya kalih tuludan bulus.
 - c. Tatepakan suaran kulkul bayu baya lan toya baya utawi gentuh atuludan bulus.

Paos 20

- (1) Kulkul Desa utawi kulkul siosan tan wenang katepak yan tan sangkaning pituduh Prajuru.
- (2) Sang nepak yan sangkaning pituduh, patut digelis atur supeksa ring Prajuru n.aka kabuatan tatepakannia.
- (3) Yan kapurug daging paos 20 wiwit (1) lan (2) inucap ring ajeng, kadanda 10 (dasa) gantang beras.
- (4) Sehanan suaran kulkul kapanca baya inucap patut katedunin olih Krama Desa sami saha makta gegawan manut wiguna.
- (5) Sukat utawi suaran kulkul Banjar lan sekaa - sekaa siosan tan wenang: matchin kulkul Desa, yan kapurug kapidanda 5 (limang) gantang beras tur kulkul inucap kedaut olih Desa

Palet 5

Indik Druwen Desa

Paos 21

Druwen Desa Adat Duda sakadi ring sor puniki :

- a. Pura Kahyangan Tiga : Pura Puseh, Pura Desa utawi Bale Agung lan Pura Dalem.
- n. Pura Penyatur Desa, sajawaning Pura Puseh Geriana Kangin, santukan ngawengku.
- c. Pura Kahyangan Desa : Pura Batur Ceta, Pura Puraji, Pura Ulun Swi
- r. Setra mwanng tunon : Setra Kangin, Setra Kelod, Setra Bangbang Biaung, Setra Pagubugan, Setra Alas Tunggal, Tunon Bangbang Biaung, Tunon Wates Tengah lan Setra Alit ring Bajangan
- k. Palemahan Desa utawi tanah palaba Pura

d LPD/Lembaga Perkreditan Desa .

Paos 22

- (1) Prajuru Desa Adat patut ngetangan padruwen desa .
- (2) Paupon - upon druwen Desa patut kanggen prabea pawangunan minckadi pangaci ring Desa, sawawaning tanah palaba sane kanggen bukti Prajuru .
- (3) Sakeluring padruwen Desa mangda wenten ilekitannia.
- (4) Bangket sane ngayah medesa mangda kaungahang ilekita .

Paos 23

- (1) Sakeluring aturan, dana punia miwah sane siosan patut kakerabang olih Prajuru Desa ring sangkepan Desa.
- (2) Sehananing busana miwah pangangge ring Pura patut kasimpen ring Pasimpenan Desa turmaning kasupeksa olih Prajuru Desa

Paos 24

- (1) Tan kalugra ngadol , ngantahang wiadin ngesahang sehananing padruwen Desa sawawaning polih putusan paruman Desa
- (2) Bangket ayahan Desa dados kaadol ring sajeroning Krama Desa Adat, sakewanten mangda kasadokang ring Prajuru Desa tur Sang numbas patut ngayahang ka Desa yan kapurug tan polih pasayuban Desa.

Palet 6

Indik Sukerta Pamitegep

Kaping I

Karang, Tegal Lan Bangket

Paos 25

- (1) Sehanan karang, tegal lan bangket wenang madruwe wates sane sampun pastika
- (2) Pekarangan tegal lan bangket patut madruwe margi
- (3) Prade wenten pekarangan, tegal lan bangket sane kabebeng, Prajuru Desa patut maosin tur ngutsahayang mangda molihang margi.
- (4) Pangargan tanah sane katuju kanggen margi manut arga sane katetapang ring sang amawarat.

Paos 26

- (1) Krama sane ngenahin karang patut nyengker karang nyane soang-soang antuk tembok, sanistannia antuk pagehan mangde pakantenane asri.
- (2) Panyengker sisi kaler lan kangin patut kakaryanin antuk sang ngamong karang inucap, punika kawastanin gegaleng kaulu

- (3) Tegal miwah bangket patut magegaleng kateben .
- (4) Telajakan patut kapiara mangda asri olih krama sane ngenahin karang soang - soang.

Paos 27

- (1) Sinalih tunggil Krama Desa Adat Duda tan kawenangang :
 - a. Ngelahlah tegak Kahyangan, setra lan sekancan tegak sane kasinangeh suci. Yan kapurug kadanda 10 gantang beras saha ngewaliang sane kalahlah maweweh upekara panyangaskara maanut dresta.
 - n. Ngelahlah karang, tegal, bangket, margi wiadin sane siosan. Yan kapurug kadanda 5 gantang beras, tur ngewaliang sane kalahlah.
 - c. Nyapuh telabah wiadin pengalapan miwah margi,. Yan kapurug kadanda 5 gantang beras, tur ngewaliang tanahe sane kacapuh.
 - r. Ngentungang wangke wewalungan lan luhu kapekarangan krama Desa siosan kamargine, karurunge, kategale lan bangket. Yan kapurug kadanda 5 gantang beras saha wangke wewalungan, luhu - luhu inucap patut katanem olih sang ngentungang
 - k. Ngembakang bebanyon kamargine, karurunge, utawi pekarangan krama siosan, bebanyon inucap patut kakaryanang blungbang. Yan kapurug kadanda 5 gantang beras
 - d. Mendem utawi ngeseng sawa ring desa pakraman sawawaning layon sang sulinggih. Yan kapurug kadanda upakara pamarisuda ring genah inucap saha danda 10(dasa) gantang beras
 - t. Ngentungang angge - anggean sawa kadesa pakraman . Yan kapurug kadanda 5 gantang beras maweweh upakara pamarisuda ring genah inucap, tur angge - anggean inucap kageseng ring setra.

Kaping II

Kekayonan

Paos 28

- (1) Ngawit nandur tanem tuwuh patut adapa agung utawi ameter tengah ngajeroang saking watese.
- (2) Prade wenten taru mentik ring sajeroning wates, yan sinalih tunggil panyandinge kababatan patut atur supeksa ring Prajuru Desa, tur Prajuru Desa patut maritetes saha ngicen panepas :
 - a. Yan yukti taru inucap patut karebah
 - n. Taru inucap kapinara tiga, asiki katur ke Desa muah sane kakalih kaepah antuk sang madruwe wates
- (3) Prade wenten wit taru kapineh jage mayanin :
 - a. Sang kajerihan patut matur supeksa ring prajuru Desa.
 - n. Prajuru Desa patut maritetes tur ngicen pamutus mangda taru inucap karebah sanistania kapunggul.

Kaping III

Wewangunan

Paos 29

- (1) Schananing wewangunan kausahayang mangda ngangge Asta Bumi miwah Asta Kosala -Kosali utawi nganutin Tri Hita Karana.
- (2) Prade wenten wewangunan ngungkulin pekarangan anak siosan, sang madruwe karang sane kaungkulin patut atur supeksa ring Prajuru Desa, tur Prajuru Desa maritetes. Yan yukti wewangunan kadi inucap

patut wewangunan punika kaured tur tan polih prabea kapocolan.

- (3) Prade ngewangun pacang ngelintangin wates, sadurungnia patut ngawentenang paigum ring panyan dinge tur kasaksinin antuk prajuru Desa saha lekita.
- (4) Krama Desa tan kalugra ngenahang barang ring telajakan utawi ring margine lintangan ring araina. Yan mamurug kadanda agantang beras sane araina.

Kaping IV

Wewalungan

Paos 30

- (1) Bacakan wewalungan luire :
Bawi, Kambing, Banteng, Kebo lan Kuda.
- (2) Sehananing Krama Desa sane mamiara wewalungan (ubuh - ubuhan) patut negul utawi nglogorin wewalungan inucap mangda nenten ngerusak karang utawi bangket minekadi pakubonan krama siosan.
- (3) Prade wenten mamurug kecaping wiwit (2) paos puniki keni danda 5 gantang beras, sahe ngewaliang barang sane karusak manut pangarga.
- (4) Prade ngerusak tegak Suci sajaba keni pamidanda manut kecaping wiwit (3) paos puniki maweweh upekara pamarisuda saha sang madruwe wewalungan inucap patut mecikang wewangunan suci sane karusak.
- (5) Prade wenten sinalih tunggil krama sane naban wewalungan, sang naban patut digelis atur supeksa ring Prajuru Desa, tan kengin kasepan ring araina saha wewalungan inucap mangda kapiara kadi patute, tur sang madruwe wewalungan patut nebas prabea pangingunnia.
- (6) Prajuru Desa risampun polih atur supeksa patut digelis maosin, saha ngicenin pamutus.

Paos 31

- (1) Sang sapa sira ugi tan kadadosang ngangon wiadin negulang wewalungan ring :
a. Palemahan Kahyangan wiadin ring setra.
n. Wewidangan palemahan anak siosan.
- (2) Prade wenten sane mamurug kecaping wiwit (1) ring ajeng paos puniki keni danda 5 gantang beras tur mecikang sane karusak utawi ngewaliang barang sane karusak manut pangarga.

Kaping V

Indik Baya

Paos 32

- (1) Bacakan baya wenten lelima kasinanggeh Panca Baya luire :
a. Jiwa baya
n. Geni baya.
c. Toya baya
r. Arta baya.
k. Bayu baya.

- (2) Rikala katiben Panca baya, sang sapa sira ugi kapatut nepak kulkul manut tetenger bayane, tur sasampune nepak kulkul patut atur supeksa ring Prajuru Desa. Yan tan jati wenten baya wenang kapidanda 50 gantang beras.
- (3) Tetenger kulkul kapanca baya manut paos 19 wiwit (3) aksara a, n, c.
- (4) Yan wenten Krama Desa, katiben arta baya luih ipun kamalingan patut digelis matur supeksa ring Prajuru Desa kalih sang amawarat.

Kaping VI

Indik Rerampagan Lan Ngaasin

Paos 33

- (1) Rikala Desa Adat Duda jagi mapewangun, wenang ngamargiang rerampagan ring wewidangan Desa Adat Duda manut wiguna.
- (2) Rikala jagi Aci Usaba Kapat, Karya Tabuh Gentuh mwang Karya Ngenteg Linggih ring Kahyangan Desa Adat Duda wenang kamargiang rerampagan lan ngaasin ring wewidangan Desa Adat Duda.
- (3) Tata karamaning ngrampag, ngaasin lan pah-pahan rampagan mwang aasan pacang ketegesang ring pasuara Desa.

Palet 7

Indik Panyanggran Banjar

Lan Sekaa Truna

Paos 34

- (1) Desa Adat Duda sajawaning kapikukuhin tur kasanggra olih Krama Banjar Patus lan Desa Pitulikur sekadi inucap ring ajeng, taler karemba antuk sekaa Truna Banjar Patus sawengkoning Desa Adat Duda pinaka seledih riwekas.
- (2) Rikala Aci Usaba Kapat, patut :
 - a. Krama Desa Pitulikur ngajabaang rejang soang - soang adiri.
 - n. Soang - soang Banjar Patus ngamijilang truna adiri.
- (3) Panyanggran Truna Banjar inucap ring wiwit (2) aksara n ring ajeng taler karentehin pawijilan marupa :
 - a. Ajengan abesantang.
 - n. Jinah bolong adasa keteng.
- (4) Yan wenten sinalih tunggil Banjar Patus tan nganutin daging paos puniki patut keni pami-danda 4 gantang beras.
- (5) Indik panyanggran Truna Banjar Patus ring sajeroning pamargin aci ring Desa Adat Duda pacang kategesang malih ring pasuara Desa.

SARGA IV

SUKERTA TATA AGAMA

Palet 1

Indik Kahyangan Desa

Paos 35

Sane kamanggehang Kahyangan Desa Adat Duda luire :

- (1) Kahyangan tiga :
 - a. Pura Puseh Duda.
 - n. Pura Desa (Bale Agung)
 - c. Pura Dalem
- (2) Pura Penyatur Desa :
 - a. Pura Desa Abian Sedah.
 - n. Pura Desa Gunung Sari.
 - c. Pura Puseh Bangbang Biaung.
 - r. Pura Puseh Geriana Kangin.
- (3) Pura Kahyangan Desa :
 - a. Pura Batur Ceta.
 - n. Pura Puraji.
 - c. Pura Ulun Swi.
 - r. Pura Praja Pati.

Paos 36

- (1) Saluiring wewangunan sane wenten ring sajeroning Pura - pura Kahyangan Desa kadi inucap ring paos 35 patut kapiara olih Krama Desa Adat Duda.
- (2) Pemaksan Desa Bangbang - Biaung, Gunung Sari, Abian Sedah lan Batur Ceta kaluputang saking pamiaran Pura - pura Puseh Duda.
- (3) Prade wenten karusakan Meru utawi (Keen) mwang Bale Agung sabinaning kabecikang olih Krama Desa Adat Duda manut paos 36 wiwit (1), taler kawenangang ngamargiang rerampangan ngewidi ring tanah tegalan lan patigasanan ring tanah bangket sane wenten ring wewidangan Desa Adat Duda.
- (4) Prade wenten karusakan ring Pura Ulun Swi, sabinaning kebecikang olih krama Desa Adat Duda manut paos 36 wiwit (1), taler kawenangang ngamargiang patigasanan ring tanah bangket sane wenten ring wewidangan Desa Adat Duda.

Paos 37

- (1) Desa Geriana Kangin kaluputang pakenin - kenin, sabinaning wenten karusakan Meru utawi (keen) ring Pura Puseh Duda kakeninin rerampangan taru ngewidi.
- (2) Desa Geriana Kangin patut ngaturang ke Desa Adat Duda :

- a. Sajeng Manis 6 (enem) beruk sanunggil kamargiang sangkepan Desa Pitulikur manut kecaping Paos 14 wiwit (2) aksara c.
- n. Sesayut Dulang Mas ritatkala Aci Usaba Kapat ring Pura Puseh Duda.

Paos 38

Krama Desa Adat Duda sane kaluputang paturunan mwang rerampagan luire :

- a. Desa Pitulikur.
- n. Sekaa Gambang
- c. Para Sulinggih
- r. Kepala Desa sawidangan Desa Adat Duda
- k. Prajuru Desa Adat Duda.
- d. Pemangku Kahyangan Desa Adat Duda.
- t. Kelihan - Kelihan Banjar Patas sawidangan Desa Adat Duda.
- s. Pemaksan Batur Ceta kaluputang amung rerampagan. Nanging leluputan rerampagan mawates amung sami macutak.

Paos 39

Sukerta Kahyangan kadi ring sor :

- (1) Prajuru Desa Adat mwang krama Desa patut ngamanggehang kasucian Kahyangan Desa.
- (2) Bacakan sane tan dados ngranjing sajeroning Kahyangan luire :
 - a. Sang sebel / ngraja swala .
 - n. Wong pawestri madruwe oka wiadin karuron slami durung akambuhan (asasih pitung raina/42raina)
 - c. Sebel pangantenan sadurung mabiakaon / marerebu.
 - r. Cuntaka sangkaning kasedaan sadurung masesapuh.
 - k. Yan tan mabusana adat
- (3) Sang mamurug sinalih tunggil kecaping wiwit (2) paos puniki patut keni pamidanda 5 gantang beras.
- (4) Pidabdab sane tan dados kamargiang ring pura :
 - a. Munggah tedun ring palinggih - palinggih sawanang pituduh Prajuru yan mamurug kadanda 5 gantang beras.
 - n. Masumpah utawi macoran sawanang polih lugraha saking Prajuru, yan mamurug kadanda 50 gantang beras.
 - c. Tan dados nyolahang ilen - ilen, sawanang pidabdab puja wali saha polih lugraha saking Prajuru Desa. Yan mamurug kadanda 25 gantang beras tur ilen - ilen inucap kawangdeang yan masolah.
 - r. Majejuden, kadanda 25 gantang beras adiri .
 - k. Prade wenten anak kasurupan, yan kasumangsayain patut kapintonin antuk genin dupa akatih, yan tan yukti kadanda 50 gantang beras, tur mawaliang barang sane karusak sahe maweweh upacara upakara pamerascita sapatute.
 - d. Macihna ngawetuang biyota, kadanda 5 gantang beras tur wicarania katurang ring sang amawarat.
 - t. Rikalaning makemit, lanang istri sane sampun kasinanggeh daha truna tan dados sirep dados asiki, yan mamurug kadanda soang -soang 5 gantang beras tur sang malaksana kamedalang saking jeroning Kahyangan inucap.

Paos 40

- (1) Prade Kahyangan kadurmanggalaan, sang mamanggihin mangda digelis masadok ring Prajuru Desa luire :
 - a. Karubuhan taru.
 - b. Kahanan wangke sato agung.
 - c. Panca baya.
- (2) Kahanan kadurmanggalaan kadi kecaping wiwit (1) paos puniki patut kaupekarain manut dresta.

Palet 2

Indik Dewa Yadnya

Paos 41

Raina aci ring soang-soang Kahyangan Desa Adat Duda luire :

- (1) Usaba emping nuju raina tanggal ping telulas (13) wiadin pat belas (14), utawi purnama sasih kasa, mangda / nemu waya .
- (2) Usaba kapat madudonan sakadi ring sor puniki :
 - a. Usaba Ceta ring Pura Batur Ceta, nuju Prawani wiadin tilem sasih katiga, utawi tanggal apisan sasih kapat nemu biantara .
 - n. Ida Betara melasti kasegara .
 - c. Usaba ring Pura Puraji :
 - Pangambuhan.
 - Pabantenan
 - Pamiyosan
 - r. Usaba ring Pura Puseh :
 - Pangambuhan
 - Pabantenan
 - k. Pamiyosan, katur ring Ida Betara Mutering Jagat
 - Nyuwung (tabuh rah tigang seet).
 - Panerunaan, Pengerejangan, mwang Babuang, mendet, seraman.
 - Pangerejangan lan Babuang
 - Pangambuhan
 - Pabantenan
 - Pamiyosan, katur ring Ida Betara Bagus Babotoh
 - Pengerejangan , Babuang, miwah Aci Katur ring Ida Betara Salonding ngeraris masineb.
 - d. Muyuh ring Pura Puseh malih solas raina saking Betara masineb
- (3) Usaba bangket araina, manut ring kawentenan pantun.
- (4) Aci mendak ring Pura Ulun Swi , kamargiang araina, nemoning tanggal ping telulas (13) wiadin pat belas (14) utawi Purnama nuju biantara manut kawentenan pantun.
- (5) Matabuhin ring Pura Puseh kamargiang araina, nuju panglong ping telulas (13) wiadin patbelas (14) utawi tilem sasih kawulu nemu biantara.

- (6) Aci Usaba Dalem, kamargiang araina nuju panglong ping telulas (13) wiadin patbelas (14) utawi tilem nemu blantara sasih kesanga.

Paos 42

Tata upacara mwang tata upakara inucap ring paos 41 wiwit (1) ngantos wiwit (6) ring ajeng pacang kaunggahang ring pasuara.

Paos 43

Indik mamenjor kadi munggah ring sor puniki :

- a. Ring raina pabantenan nuju Usaba ring Pura Puseh kadi inucap ring paos 41 wiwit (2) aksara, Krama Desa Adat Duda patut mamenjor ring soang - soang pamedal prade mamurug kadanda agantang beras.
- n. Ring raina Anggara Wage Dungulan Krama Desa Adat Duda patut mamenjor ring soang - soang pamedal lan desa Pitulikur mamenjor ring :
 - Pura Puseh Duda tetiga
 - Pura Puraji kakalih
 - Pura Ulun Swi asiki
 - Pura Dalem kakalih
 - Pura Batur Ceta asiki
- c. Yan mamurug sinalih tunggil kecaping ring ajeng kadanda agantang beras sane apenjor.

Paos 44

- (1) Desa Pitulikur maka pamucuk sajeroning ngelaksanaang sehananing pamargin aci manut kecaping paos 41 wiwit (1) ngantos pada wiwit (6)
- (2) Prabea aci manut kecaping paos 41 sakadi ring sor :
 - a. Usaba emping prabeania saking Desa Pitulikur.
 - n. Usaba Kapat manut kecaping paos 41 wiwit (2) prabeania saking Desa Pitulikur lan Krama Desa Adat mwang aasan lan rerampagan
 - c. Usaba Bangket, matabuhin, lan mendak prabeania saking Desa Pitulikur.
 - r. Usaba Dalem prabeania saking Desa Pitulikur kalih sabuhan limang keteng jinah bolong saking Krama Desa Adat soang - soang kelihan Banjar Patas, polih ajang atanding.
 - k. Ring raina Usaba Dalem taler kawentenang pacaruan manca sata, prabeaipun saking Krama Desa Adat.
- (3) Saluiring sane durung munggah ring paos 41 lan 42 pacang kaunggahang ring sajeroning pasuara tur kamargiang manut dresta.

Paos 45

- (1) Ring soang - soang Kahyangan Tiga, Pura Penyatur, Desa, Pura Kahyangan Desa ring Desa Adat Duda kawentenang Pemangku.

- (2) Tata cara ngadegang Pemangku sekadi ring sor :
- Ngambil saking turunan wiadin waris.
 - Nunas pawuwus Widi utawi nyanjan.
 - Kasudi olih krama Desa Adat.
 - Turun sekar.
- (3) Tan wenang kadegang dados Pemangku riantukan :
- Cedangga (peceng, perot, cungh lan sapanunggalan ipun).
 - Kageringan (sakit ile, nyan, buduh lan sapanunggalan ipun).
 - Macihna mapamargi corah.

Paos 46

- (1) Swadarmaning Pemangku luire :
- Nitenin lan nyanggra indik kasucian Kahyangan.
 - Ngantebang aturan ritatkala kalaksanayang aci, sajawaning sane kapuput olih Ida Pedanda.
- (2) Pemangku tan dados :
- Ngambil anak seda.
 - Mamunyah
 - Sareng magebagan.
 - Nyulubin longlongan wiadin penyemuhan.
 - Matetegenan lan masasuhunan.
 - Dados saksi ring sajeroning wicara sajawaning kabuatang antuk sang amawarat.
 - Tan mapengangge sarwa petak ritatkala ngantebang bebanten.
 - Masumpah utawi nyayub cor.
- (3) Prade mamurug sinalih tunggil kecaping ring ajeng Pemangku patut merayascita raga kasaksinin olih Prajuru Desa.

Paos 47

- (1) Pemangku Desa kagentosin sangkaning
- Seda
 - Pinunas ngraga sasampun polih lugraha saking paruman Desa.
 - Macihna sungkan - sungkanan
 - Kausanang macihna malaksana corah.
- (2) Prade sinalih tunggil Pemangku Kahyangan Tiga kapialang sane patut nyeledihi amung Pemangkun Desa.

Paos 48

- (1) Pamangku Desa polih patuas luire :
- Upon tanah palaba utawi buktian Pemangku sane wenten ring subak Pesangkan linggahne 15 are.

- n. Cenengan sehanan olih - olih daging daksina lan sesarin canang ,luire :
 - Daksina apah tigaan.
 - Sesarin canang apahempatan sareng Prajuru Desa minekadi Pasek, Kebayan lan Penyarikan .
- c. Luput ayahan lan paturunan.
- r. Luput aasan,rampagan lan patigasanaan amung sami masukat.

(2) Prade Pemangku Desa katiben baya pati, polih prabea upacara saking Desa Adat luire :

- a. Beras 60 gantang
- n. Ketan 10 gantang
- c. Injin 4 gantang
- r. Taluh 25 bungkul
- k. Kelapa 25 bungkul
- d. Kasa 25 meter
- t. Jinah bolong 1000 keteng

Paos 49

- (1) Yan wenten sane ngaturang dana punia miwah naur sosot patut matur riin ring Prajuru Desa mangda kaunggahang sajeroning lekita .
- (2) Aturan dana punia lan panauran sosot marupa laluesan mule -mule lan sapanunggilan ipun kaunggahang druwen desa.
- (3) Panauran sosot sane maruntutan guling bawi wenang katurang asampel maka pamuputing sosot.
- (4) Panauran sot sane marupa sanganan buntilan wenang katurang sepihan buntilan maka pamuput sosot.

Palet 3

Indik Resi Yadnya

Paos 50

- (1) Sang madruwe Yadnya patut ngaturang punia ring sang muput manut agung alit yadnyane.
- (2) Prajuru patut ngawas tur ngayomin wiadin mialangin, yan wenten mapemargi ngelantudin pamargin yadnyane.

Palet 4

Indik Pitra Yadnya

Paos 51

Pamargin Pitra Yadnya sane kamanggehang ring wewidangan Desa Adat Duda sekadi ring sor :

- (1) Pangupakaran sawa luire :
 - a. Mendem, makingsan ring ibu pertiwi.
 - n. Ngeseng ngeraris nganyut, makacihna makinsan ring geni kalih toya .
 - c. Atiwa - tiwa / ngaben.
- (2) Yan wenten anak alit seda sane durung ketus untu patut kapuput antuk upekara pangentas

Paos 52

Swadarmaning lan tetegenan prade wenten sinalih tunggil krama kasedayan :

(1) Sang kasedayan :

- a. Patut nyadokang ring Pajuru Desa Adat.
- n. Patut nyadokang ring Prajuru Banjar.

(2) Panyanggra krama Banjar sakadi ring sor:

- a. Nepak kulkul
- n. Maputusan manut dresta ring Banjar soang-soang.
- c. Krama Banjar lanang istri ngambil karya manut dresta banjar soang - soang.

(3) Panyanggran krama Banjar ring sajeroning ngrembat sawa miwah upacara kasetra mangda dabdab tur trepti.

(4) Tatkala ngrembat sawa tan kadadosang :

- a. Ngumbang ambing sawa
- n. Swadarmaning ngrembat sawa patut dabdab tur alon saha karuntutin antuk kidung kekawin

Paos 53

(1) Tan kawenangang mendem, ngeseng sawa mwang atiwa-atiwa ritatkala aci ring Kahyangan Desa luire;

- a. Usaba emping araina
- n. Usaba kapat pat belas dina, ngawit saking metang dinaang saking Betara melasti kasegara kantos dina masineb.
- c. Nyungsung araina
- r. Usaba dulun uma araina
- k. Mendak araina
- d. Matabuhin araina
- t. Muyuh araina
- s. Usaba Dalem araina
- w. Karya nyuci gening ring Kahyangan Desa, ngawit saking raina tedun nyuci kantos dina ngelemekin
- l. Warah - warah saking Parisadha Hindu Indonesia

(2) Sajawaning larangan inucap ring ajeng, taler tan kawenangang mendem, ngeseng, atiwa-atiwa, utawi ngaben manut larangan dina sakadi ring sor :

- a. Perwani, Purnama.
- n. Tilem.
- c. Buda Kliwon.
- r. Buda Wage.
- k. Wraspati wage sungsang.
- d. Saniscara Kliwon.
- t. Tanggal mwang panglong apisan.
- s. Semut sedulur
- w. Kala gotongan
- l. Pasah
- m. Anggara kliwon

- g. Kajeng Kliwon
- b. Ngeraina

- (3) Prade wenten krama seda ritatkala larangan sakadi wiwit (1) inucap ring ajeng, sawane patut magingsir katulak tanggul, kasetra mwang kasabuh sisi kelod, yan mamurug kadanda 60 gantang beras saha sawane patut kagingsirang olih sang madruwe sawa, tur marisuda ring Kahyangan Desa.

Paos 54

Sawa sane patut kapendem pramangkin sedane sangkaning :

- a. Sajeroning bobot.
- n. Sawa anak alit sane durung ketus untu
- c. Sawa sane keni panyungkan nglahlah

Paos 55

Prade wenten krama seda rikalaning rainan kekeran desa sawane dados kapendem nanging pamargine wengi saha tan dados kabintakin. Yan mamurug kadanda 25 gantang beras tur maweweh upakara panyangaskara.

Paos 56

Yan wenten anak seda sajeroning pekarangan anak sios, tegal, margi lan sapanunggalan ipun, patut sang madruwe sawa marayascita genah inucap manut dresta, yan mamurug kadanda 25 gantang beras tur genah inucap kaparisuda olih Desa.

Paos 57

Prade wenten anak seda sangkaning salah pati utawi ngulah pati kengin sawane kaprateka sakadi patute risampun kamanggala antuk upakara pangulangan.

Paos 58

- (1) Mungguing kacuntakan sang kasedayang ngantos wusan masapuh
- (2) Sang madruwe sawa durung kepus odel, yogya kacuntakania asasih pitung raina
- (3) Tan keneng cuntaka luire :
 - a. Sang Sulinggih
 - n. Pemangku Kahyangan Desa Adat

Paos 59

- (1) Bacakan pamargin atiwa-tiwa utawi ngaben luire :
 - a. Sawa prateka
 - n. Asti Wedana
 - c. Nyuasta
- (2) Pamargin pangabenan wenten kalih soroh luire :

- a. Ngaben dadakan sangkaning kepadaman
- n. Ngaben nuka nyabran awarsa kamargiang ping tiga nuju sasih sada, kasa lan karo

- (3) Pangambilan upakara ring ajeng, nista, madya, utama manut kawentenan

Paos 60

- (1) Sakeluiring upacara-upakara atiwa-tiwa, ugi kamargiang ring setra sajawaning layon Sang Sulinggih Yan mamurug kadanda 60 gantang beras saha maweweh upacara panyangskara ring Desa.
- (2) Yan pamargin pangabenan meanin utawi ngebet sawa tulange tan dados kabakta mantuk utawi ka Desa pakraman, yan mamurug kadanda 60 gantang beras, tur tulang punika patut kawaliang kabakta kasetra.

Paos 61

- (1) Prade wenten anak saking dura Desa ayat mendem sawa utawi masmi, lan ngelaksanaang atiwa-tiwa ring Desa Adat Duda patut matur supeksa mapinunas ring Prajuru Desa. Yan kalugra sang mapinunas patut naur penanjung batu 60 gantang beras.
- (2) Yan wenten anak mawiwit saking Desa Adat Duda sane wusan makrama sangkaning rahayu, sakewanten magenah ring dura desa, prade riwekas mawali ka Desa sadurung makrama mapikayun pacang mendem sawa, ngeseng lan kamargiang upacara upakara atiwa-tiwa ring setra Adat Duda patut atur supeksa mapinunas ring Prajuru Desa. Yan kalugra patut sang mapinunas naur penanjung batu 10 gantang beras.
- (3) Majeng ring Krama sane kaeladang utawi tan manut makrama Desa sakewanten mula muwed saking Desa Adat Duda patut naur genah ngendem utawi atiwa-atiwa ring setra antuk 60 gantang beras.

Palet 5

Indik Manusa Yadnya

Paos 62

- (1) Manusa Yadnya inggih punika upacara upakara darmaning manusa, ngawit saking patemoning kama bang lawan kama petak sajeroning garba ngantos kelayu sekar riwekas.
- (2) Sang pacang mapodgala madwijati, sajaba nunas panugrahan ring sang amawarat patut atur supeksa ring Prajuru Desa.
- (3) Prajuru Desa sareng nitenin, nureksa mangda sulur miwah pamargine jati-jati manut ring kecaping Agama.
- (4) Sasampun puput padwijatine, Prajuru Desa patut digelis ngentosin pesengan sang madwijati ring sehanan lekita antuk biseka kawikon manut panugrahan nabene saha kasiarang ring paruman Desa Adat Duda.

Palet 6

Indik Buta Yadnya

Paos 63

- (1) Buta yadnya inggih punika pabeakalaan ring ibu pertiwi lan ring palemahan Kahyangan Desa mwan sarwa prani lan sarwa babutan.

- (2) Upacara-upacara pabeakalaan ring ibu pertiwi lan ring palemahan Kahyangan Desa kawastanin macaru.
- (3) Pacaruan inucap luire :
- a. Eka sata.
 - n. Panca sata.
 - c. Resi gana.
 - r. Panca sanak.
 - k. Panca kelud.
 - d. Balik sumpah.
 - t. Taur kasanga.
 - s. Tabuh gentuh.
- (4) Pamargin patabuh gentuh kawentenang nangken Dasa Warsa nemuning Rah Windu
- (5) Rikala kamargiang patabuh gentuh, bangket sane wenten ring sawengkon Desa Adat Duda wenang kakeninin patigasanaan

Paos 64

- (1) Pamargin brata panyepian wus taur kasanga, wiadin wus matabuh gentuh manut catur brata sakadi mungguh ring sastra Agama.
- (2) Sajawaning ring linggih sakadi ring sor :
- a. Jero Gede lan Geria Gede.
 - n. Linggih Ida Pedanda.
 - c. Sang madruwe rare sajeroning durung mayusa enem sasih.
 - r. Metepetin anak sungkan.
 - k. Genah sane madruwe layon.
- (3) Sang mamurug sinalih tunggil brata panyepian inucap ring wiwit (1) paos 65 patut keni pamidanda beras 2 (kalih) gantang.

SARGA V

SUKERTA TATA PAWONGAN

Palet 1

Indik Pawiwahan

Paos 65

- (1) Pawiwahan inggih punika patemuaning purusa lawan pradana melarapan pananggalan kayun suka cita kadulurin upasaksi sekala niskala.

- (2) Pamargin pawiwahan kadi inucap ring ajeng luire :
- a. Mamadik utawi ngidih
 - n. Marangkat utawi ngrorod
 - c. Nyentana /nyeburin
- (3) Pidabdab sang marabian patut :
- a. Manut kecaping Agama Hindu
 - n. Nganutin yusa sakirangnia risampun macihna mungah dahan truna
 - c. Sangkaning suka cita.
 - r. Prade sang pacang karangkatang sios Agama patut kamargiang upacara sudhi wadani sasampun wenten lekita lugraha saking Parisadha.
- (4) Pamargin pawiwahan inucap mangda nganutin dresta Desa Adat Duda.
- (5) Sang mamurug kecaping ring ajeng, patut karauhang ring Prajuru, yan tan prasida lantur karauhang ring sang amawarat mangda kabaosin tur kicen pamutus.

Paos 66

Pawiwahan sane kabaos patut ring sajeroning Desa Adat Duda, manut kecaping paos 65, risampun macihna :

- a. Kamargiang pawidi - widanaan sanistania pabeakalaan utawi parebuan.
- n. Kasaksinin olih Prajuru lan sang amawarat.
- c. Wenten lekita saking sang amawarat sane mawasta Akte Perkawinan

Paos 67

Tata caraning parabian madudonan kadi inucap ring sor :

- (1) Pamargin mamadik :
- a. Patut masadok ring Prajuru.
 - n. Prajuru maritetes tur maminehin manut tan manut patemuania
 - c. Ngamargiang runtutan papadikan
- (2) Marangkat utawi ngrorod
- a. Saking purusa patut ngawentenang pajati antuk duta sakirangnia kalih diri, saha tan kengin kasepan araina.
 - n. Yan tan wenten pajati, saking wadu, kapatut kamargiang panegdeg sane kasarengin antuk Prajuru sahe saking sang amawarat.
 - c. Prade pajatine tan katerima utawi wirangnia tan wenten ring jeronne, sang mapajati patut ngrauhang ring sang amawarat.

Paos 68

- (1) Bacakan laksanane sane ngawinang cemer mantuk ring Desa Adat luire ;
- a. Drati krama : Ngrabinin wong arabi utawi nyolong semara mawastu kadapetan.
 - n. Mitra ngalang : Sakedi anak makurenan nanging tan mawidi widana jantos tigang sasih.
 - c. Gamia Gamana luire :
 - Ngerangkatang meme teman.
 - Ngerangkatang Tumin diya nyama saking purusa mwan wadu
 - Ngerangkatang Matua, matua diya nyama
 - Ngerangkatang Nini kapurusa lan Nini wadu
 - Ngerangkatang Nyama di Cedar
 - Ngerangkatang Cucu Temen, cucu diya nyama
 - Ngerangkatang Mantu
 - Ngerangkatang Nyama dicambra
 - Ngerangkatang Pianak kalih Kewalon
 - r. Badawasa : Manyanggama lanang lawan lanang utawi istri lawan istri.
 - k. Salah timpal : Inggih punika manusa masanggama sareng Sato
- (2) Sang mapemargi sakadi sinalih tunggil ring ajeng patut karauhang ring sang amawarat, tur patut marayascita raga kalih ngawentenang upacara panyangaskara ring Desa.
- (3) Yaning wenten Krama Desa sane marabian ka Dura Desa ring pamuput utawi maserah mangda kasaksinin antuk Prajuru, genahe mabaosan mwan maka srana canang pangraos.

Paos 69

- (1) Prade wenten anak lanang mobotin anak istri sane sami-sami durung madruwe rabi sabda pariangken, Prajuru patut majangkepeng tur keupacarayang sakadi patute olih sang lanang, saha kadanda 10 gantang beras
- (2) Prade sinalih tunggil tan tinut kjangkepeng, kadanda 100 gantang beras saha wicarania katurang ring sang amawarat
- (3) Yan sinalih tunggil marabi sampun wenang wicarania karauhang ring sang amawarat olih wirangnia yan tan madruwe wirang patut kamargiang olih Desa. Prade mamurug wirangnia kadanda 100 gantang beras.
- (4) Yan wenten anak istri bobot, nenten kaupacarayang bobote sareng anak lanang, yadiastun mesrana antuk keris macihna anak lanang, prade ri wekas bobotane embas mangda anake alit tan kasinanggeh anak bebinjat, patut :
- a. Anake istri punika nglaksanaang upacara wiwaha pawidi widanaan masedana antuk keris macihna ngadegang anake lanang sane mobotin
 - n. Anake alit patut kaupacarain antuk upacara prayascita.
 - c. Pamargin upacara inucap kasaksinin antuk Prajuru Desa.
- (5) Yaning wenten anak istri bobot patut :
- a. Sang kedalih mobotin tan kapariangken, wenang sang mobotin kalih sang kedalih madewa saksi ring sinalih tunggil Tri Kahyangan Desa saha kasaksinin olih Prajuru Desa.
 - n. Prade wenten anak siosan ring sang kedalih mariangken sareng mobotin wenang sang mariangken

punika sareng madewa saksi. Sasampun dewa saksine kamargiang bobotan anake istri kawidi widanain masedana antuk keris.

- c. Prade sang patut madewa saksi tan satinut ngamargiang padewa saksi sang kabobotin utawi wirangnia patut ngaturang wicara punika ring sang amawarat. Yan tan kamargiang soang - soang kadanda 200 (satak) gantang beras.

- (6) Prade wenten anak istri mobot tan sangkaning marabian sadurung bobotane kaupakarain tan kawenangang ngranjing ring sehananing Pura sawidangan Desa Adat Duda. Yan kapurug kadanda 10 gantang beras tur kalaksanayang upacara prayascita ring Pura sane karanjingin.

Palet 2

Indik Palas Marabian

Paos 70

- (1) Parabian prasida usan melarapan antuk palas utawi sinalih tunggil seda.
- (2) Wusan marabian wiadin balu riantukan sinalih tunggil lampus.
- (3) Palas marabian, wenten sangkaning pada lasia, utawi mawiwit wicara macihna tan tumus suka citaning panunggalan idep sang alaki rabi mapiteges nyapian.
- (4) Tata cara palas marabian
 - a. Yan wenten Krama Desa mapikayun pacang palas marabian patut atur supekša ring Prajuru Desa, olih Prajuru Desa wicarannia kabaosin tur kaicen tatimbang mangda setata ngutsahayang adung malih.
 - n. Yan wenten tatimbang Prajuru Desa tan katerima, wicarane dados kalanturang ring sang amawarat prade pamutus sang amawarat patch kadi tatimbang Prajuru Desane, kadanda 25 gantang beras.
 - c. Palas marabian kasinanggeh sah sasampun polih pamutus saking sang amawarat saha kasiarang ring Banjar Patus.

Paos 71

- (1) Prade riwekas sang palas marabian makacihna adung marabian malih, patut nglaksanaang pawiwahan malih apisan.
- (2) Pamargine kadi inucap ring wiwit siki paos puniki, patut keni pamidanda 20 gantang beras nikel saking palase riin, diastun palase pada lasia.

Palet 3

Swadarmaning Balu

Paos 72

- (1) Swadarmaning Balu inucap patut :

- a. Ngawisesa waris, paguna kaya, tan kuasa ngadol, ngadeang, makidhang sajeroning durung polih pamutus paigum saking sang patut ngwaris.
- n. Yening balu inucap meras sentana kadadosang, yan sadurung sinalih tunggil seda sampun wenten pidabdab tur kasetujuin antuk keluarga kapurusa.
- c. Manut sakadi pamargin parabian ring Desa Adat Duda kengin ngambil baluan semeton, minekadi ipah cerikan utawi kelihan.

Paos 73

- (1) Balu luh tan pageh luire :
Matilar saking karang paumahan tan pasadok sajeroning tigang sasih.
- (2) Prade balu luh inucap pageh nganutin swadharmanian, katundung antuk sentanania utawi kulewarga kapurusa, balu inucap patut polih pahpahan pagunakayan.

Palet 4

Indik Sentana

Paos 74

- (1) Mungguing sentana wenten kalih soroh :
 - a. Prati Sentana.
 - n. Sentana paperasan.
- (2) Prade pawiwahane tan ngawetuang sentana, kengin ngedih sentana antuk upasaksi sekala niskala sane kawastanin paperasan

Paos 75

- (1) Paperasan sane kasinanggeh patut (syah) ring Desa Adat Duda risampun makacihna :
 - a. Widi widana paperasan.
 - n. Kasaksiang Prajuru Desa saha kasiarang ring paruman.
 - c. Wenten lekita manut tata cara sulur indik pamargin paperasan.
- (2) Sane dados kaperas kanggen sentana kadi inucap ring sor :
 - a. Anak sane me Agama Hindu.
 - n. Papernahan nedunang saking sang meras.
 - c. Keluarga saking purusa, yan tan wenten kengin saking wadu prade taler tan wenten wawu dados sakita karep.

Palet 5

Indik Waris

Paos 76

- (1) Waris inggih punika tatamian arta brana saha ayah - ayahan ngupadi sukerta sekala niskala saking kaluhurannia majeng ring turunannia.

- (2) Sane kasinanggeh Warisan luire :
- a. Druwe tengah merupa tanah, karang paumahan, pamerajan lan sapanunggilan ipun.
 - n. Guna kaya, tatadtadan, jiwa dana, utang minekadi ngutangang lan sapanunggilan ipun.
- (3) Wawu kengin kabaos warisan prade :
- a. Wenten sang mapiturun warisan (pusaka)
 - n. Wenten turunannia utawi ahli warisania.
 - c. Wenten arta brana miwah tetegenan, ayah - ayahan, marupa warisan.

Paos 77

- (1) Sang sinanggeh waris luire :
- a. Prati sentana purusa utawi saking lanang.
 - n. Sentana paperasan.
- (2) Perade tan wenten waris kadi inucap ring ajeng, sang sinanggeh waris luire :
- a. Turunan purusa pernah ngunggahang, makadi rarama, misan, mindon, mwang selantur ipun ngunggahang.
 - n. Turunan purusa pernah kasamping, makadi keponakan dimisan, keponakan dimindon, mwang selantur ipun nedunang.
- (3) Yan putung (camput) tan madruwe papernah waris, patut kawenangang antuk dadia, yan tan madruwe dadia, kawenangang antuk Desa Adat.

Paos 78

Swadarmaning waris patut ngupadi laksana manut kecaping Tri renem makadi :

- a. Nerima saha ngutsahayang tetamian keluhurannia.
- n. Ngrempon sanggah (pamarajan), pura padadian, Pura Kahyangan sajeroning Desa pakraman.
- c. Ngabenang sang kawarisin saha nglanturang upakarannia manut pidabdab Pitra Yadnya

Paos 79

- (1) Risampun Pawaris nglaksanaang swadarmaning waris manut kecaping paos 77 ring ajeng, patut kawentenang pahpahan waris.
- (2) Pahpahan waris kadi inucap ring sor :
- a. Waris polih pada, sangkaning paguna kaya.
 - n. Sentana luh selami durung marabian polih pedum waris sakewanten kengin muponin kemaon.
- (3) Pawaris kengin mapeweweh rikala kanton murip ring pianak sane kesah marabian marupa :
- a. Arta dana tetadtadan pinih akeh apah tigaan saking padruwenyane.
 - b. Pedum tetegenan wiadin pedum raksa, pahpahan waris patgatakala jantos pedum jumenek arep ring waris.

- 1) Sinalih tunggil waris tan polih pedum waris prade nyentana utawi mrangkat nyeburin.
- 2) Miwah nilar Agama Hindu

Paos 80

prade sajeroning pakulawarga wenten pawaris langkungan ring adiri patut :

- a. Kawentenang paigum indik waris inucap mangda prasida adung.
- b. Yan tan kasidan, katunasang tatimbang ring Prajuru Desa.
- c. Prade tan cumpu ring tatimbang Prajuru Desa, kengin wicara inucap katunasang ring sang amawarat.

SARGA VI

WICARA LAN PAMIDANDA

Palet 1

Indik Wicara

Paos 81

- 1) Yan wenten krama Desa Adat Duda mawicara, wenang wicara inucap kabaosin olih :
 - a. Kelihan Banjar Patus, yaning krama sane mawicara panunggilan bebanjaran.
 - b. Prajuru Desa Adat, yaning sang mawicara panunggilan Desa Adat.
- 2) Indik maosin/nepasin wicara inucap tan maren ngupadi darma kawelas asihan tur melarapan antuk :
 - a. Lekita bukti saksi
 - b. Tan maren mangda nepek ring sedaging Awig - awig pasuara lan pararem.
- 3) Prade sang mawicara tan manut ring panepas/tatepasan Kelihan Banjar Patus sang mawicara wenang nunas kapatutan ring Prajuru Desa Adat.
- 4) Prade taler sang mawicara tan cumpu ring pamatut sane katiwakang olih Prajuru Desa Adat, wenang wicara inucap kalanturang utawi katurang ring sang amawarat.

Paos 82

- 1) Sakancan wicara sane wetu ring Desa Adat, Prajuru patut rigelis maosin tur ngicen pamutus.

Palet 2

Indik Pamidanda

Paos 83

- (1) Banjar utawi Desa Adat Duda, wenang niwakang pamidanda ring Krama Banjar utawi Krama Desa Adat sawengkoning Desa Adat Duda.
- (2) Patiwak danda inucap kalaksanayang olih Kelihan Banjar Patus utawi olih Prajuru Desa Adat Duda.
- (3) Ageng alit pamidanda masor singgih manut kasisipan.
- (4) Jinah utawi arta brana pamidanda dados druwen Banjar utawi Desa Adat.
- (5) Prade Prajuru mamurug kecaping Awig - awig, keni pamidanda nikel ring Krama Desane wiadin kengin kausanang manut pararem Desa.

Paos 84

Bacakan Pamidanda luire :

- a. Danda Upakara - upakara.
- n. Danda arta.
- c. Danda ngayahang ring Banjar utawi ring Desa.
- r. Danda kedaut.
- k. Danda kaeladang.

Paos 85

- (1) Rikala pawanengan naur paturunan, dedandan mwanng utang yening celed ring waneng patut naur nikel.
- (2) Risampune keni danda nikel mawaneng asangkepan taler tan kataur patut kamargiang dedautan.
- (3) Tata cara penautan lan pasawenan kalaksanayang kadi inucap ring sor :
 - a. Tan wenang naut wiadin nyawenin barang sane patut kamomotang manut kecaping Sastra Agama
 - n. Tan kengin naut wiadin nyawenin papayon miwah wewalungan sane ngemademang pangupajiwa sang kedaut wiadin kasawenin makadi : pewaregan, banteng, kebo miwah jaran.
 - c. Dedautan utawi sasawenan kamargiang olih Prajuru Banjar utawi Prajuru Desa Adat.
 - r. Kelihan Banjar utawi Desa nitenin mangda barang sane kadaut utawi kasawenin patut katebas mawaneng tigang raina saking kedaut utawi sasawenan kamargiang.
 - k. Yan kantos langkung ring pewanengan (tigang raina) barang dedautan utawi sasawenan inucap pacang kalelang ring ajeng krama Banjar utawi krama Desa Adat.
- (4) Yaning krama sane kedaut wiadin kasawenin tan satinut sakadi sane munggah ring palet 1 lan 2 paos puniki turmaning tan wenten usaha pacang naur utang nyane, patut krama inucap kaeladang makarama Banjar utawi makrama Desa.

SARGA VII

NGUWAH NGUWUHIN AWIG - AWIG

Paos 86

- (1) Nguwah - nguwhin awig - awig Desa Adat Duda kamargiang antuk pararem Desa.
- (2) Paruman inucap mangda kadasarin antuk gilik saguluk krama Desa Adat Duda.
- (3) Pamutus babaos mangda kadasarin antuk pararem maduluran gilik saguluk. Yan tan prasida suara sane makehan kasinanggeh pamutus.

Paos 87

Paruman indik nguwah nguwhin Awig - awig kadi ring ajeng kengin kamedalang antuk Prajuru Desa.

SARGA VIII

PAMUPUT

Paos 88

- (1) Awig - awig puniki kamargiang ngawit kararemin.
- (2) Awig - Awig puniki kawastanin Awig - awig Desa Adat Duda.

Paos 89

- (1) Sakeluring sane wenten sadurungnia patut kamargiang manut dresta.
- (2) Sakeluring sane durung kabaosin sajeroning Awig - awig puniki patut kalaksanayang manut tata cara sane sampun ketah kamargiang kadulurin antuk pararem.

Paos 90

- (1) Awig - awig puniki kadegang antuk Desa kadi Prajuru Desa Adat Duda duk raina Anggara kasih wuku Medangsia Sasih Kadasa Icaka 1916.
- (2) Prajuru Desa Adat Duda kalih para saksi sane sareng ngardi Awig - awig puniki sahe ngalingga tanganin.
- (3) Luir sang ngalingga tanganin :

Prajuru DESA ADA'i :


Prajuru DESA ADAT :

1. Pasek,



I Nyoman Rantun

2. Kebayan,



I Nengah Dana

3. Penyarikan,



I Nengah Beratha


4. Pemangku Desa,



I Gusti Mangku Dereda

5. PENGURUS ADAT

1. Ketua,



I Gusti Gede Ngurah

2. Wakil Ketua,




Drs. I Komang Latra

3. Sekretaris I,



Drs. I Gde Suartha

Sekretaris II,



I Wayan Geria

5. Bendahara,



I Ketut Merta Darmayasa.

Kelihan - Kelihan Banjar Patus Desa Adat Duda :

1. Kelihan Banjar Duda,



I Ketut Dangin

2. Kelihan Banjar Lila,



I Gusti Ngurah Arta

3. Kelihan Banjar Tengah,



I Wayan Degol

4. Kelihan Banjar Jangu,




I Ketut Swena

5. Kelihan Banjar Pegubugan,



I Ketut Luyu

6. Kelihan Banjar Bangbang Biaung,



I Wayan Mangku

7. Kelihan Banjar Alas Tunggai,



I Ketut Sanggra

8. Kelihan Banjar Pesangkan Kawan,



I Wayan Sumiarta

9. Kelihan Banjar Pesangkan Gede,



I Nyoman Lama

10. Kelihan Banjar Pesangkan Duran,



I Wayan Tamtawi

11. Kelihan Banjar Tegal Let,



I Wayan Wirta

12. Kelihan Banjar Tegal Anyar,



I Wayan Medal

13. Kelihan Banjar Pesangkan Kangin,



I Gusti Gede Karang

14. Kelihan Banjar Wates Tengah,



I Wayan Suweca

15. Kelian Banjar Wates Kangin



Made Dipta

16. Kelihan Banjar Wates Kaja



Ketut Sudana

17. Kelihan Banjar Ketket




Nengah Lama

18. Kelihan Banjar Juuk Legi




Nyoman Sidemen

19. Kelihan Banjar Swasta Karya



Komang Sukra

20. Kelihan Banjar Yadnya Karya



Wayan Dura

21. Kelihan Banjar Darma Karya,




Ketut Datarata

22. Kelihan Banjar Janglap,




Nengah Suparta

23. Kelihan Banjar Batu Gede,



Gede Suweca

24. Kelihan Banjar Abian Canang Kaja,



Nyoman Bakti

25. Kelihan Banjar Canang Kelod,





Wayan Gariasa

26. Kelihan Banjar Taman Bali,



Made Pasek

SAKSI SAKSI :



Amlapura, 26 April 1994

Mengetahui dan telah dicatatkan.

BUPATI KEPALA DAERAH TINGKAT II KARANGASEM.



SUSUNAN PANITIA PERUMUS PENULISAN Awlg - Awlg DESA ADAT DUDA

Pelindung
Penasehat

Ketua Umum
Ketua I
Ketua II
Ketua III
Sekretaris I
Sekretaris II
Sekretaris III
Bendahara I
Bendahara II
Seksi - seksi

: Muspika Kecamatan Selat.
: 1. Kepala Desa Adat Duda.
: 2. Kepala Desa Duda
: 3. Kepala Desa Duda Timur
: Drs. I Gusti Lanang Rai
: Drs. I Komang Redhana Wiratha
: I Ketut Mertha SH.
: Drs. I Nengah Cenik Astawa.
: I Ketut Mawa Astawa.
: I Komang Alit.
: Drs. I Made Bendesa
: dr. I Gusti Nyoman Susila.
: I Nyoman Suartha.
: Seperti tercantum dibawah ini

Seksi / Pembidangan	No.	N a m a	A l a m a t	Jabatan dalam Seksi
1	2	3	4	5
I.				
a. Ketatwaning Desa Adat	1	I Nyoman Tunas	Pesangkan	Ketua Merangkap Anggota
b. Murda Cita	2	I Wayan Sudia	Pesangkan Kangin	Anggota
	3	I Wy. Gd Pertama Putra	Jangu	Anggota
c. Aran lan wewidang an	4	I Ketut Data Rata	Jangu	Anggota
II.				
a. Petitis lan Pami-kukuh	1	Ir. I Nyoman Supartha	Jangu	Ketua merangkap Anggota
b. Sukerta tata Pa-kraman	2	Drs. I Komang Arka	Wates Tengah	Anggota
	3	I Ketut Bona	Wates Kangin	Anggota
	4	I Wayan Suweca	Wates Tengah	Anggota
	5	I Nyoman Sucipta	Duda	Anggota
III. Sukerta Tata Agama				
	1	I Komang Gede Geria	Wates Kangin	Ketua merangkap Anggota
	2	Drs. Ida Bagus Angga	Pesangkan Kangin	Anggota
	3	I Made Suela	Wates Tengah	Anggota
	4.	I Made Rika	Jangu	Anggota

IV. Sukerta Tata Pawongon	1	I Wayan Wirta		35
	2	I Putu Suwika, SH	Pegubugan	Ketua merangkap
	3	I Ketut Nulama	Duda	Anggota
	4.	I Wayan Cenik Suarta	Duda Wates Tengah Jangu	Anggota Anggota Anggota
V. a. Wicara lan Pamidanda. b. Nguwah - nguwu - hin Awig - Awig c. Pemuput	1	I Nengah Sekar	Pegubugan	Ketua merangkap
	2	I Ketut Keneng, SH.	Pesangkan	Anggota
	3	I Gusti Gede Nanda	Pesangkan Kangin	Anggota Anggota
	4	I Wayan Medal	Pesangkan Tegal	Anggota

Duda, 20 September 1993

Kepala Desa adat Duda,

ttd

I Gusti Gede Ngurah

**TEAM PENYUSUN / PENELITI Awig -awig DESA ADAT
KABUPATEN DAERAH TINGKAT II KARANGASEM**

I. PENASEHAT

- : 1. Bupati Kepala Daerah Tingkat II Karangasem..
- 2. Sekretaris Wilayah / Daerah Tingkat II Karangasem.
- 3. Kepala Kantor Departemen Agama Kabupaten Karangasem.

II. KETUA

- : I Wayan Sudiarta, SH (Kepala Bagian Hukum Setwilda Tingkat II Karangasem.

WAKIL KETUA

- : Ida Bagus Pidata Adnyana (Ketua Parisada Hindu Dharma Kabupaten Karangasem)

SEKRETARIS

- : Anak Agung Gde Rai, SH (Staf Bagian Hukum).

III. ANGGOTA ANGGOTA

- 1. I Nengah Pasek, SMHK (HPIA Kabupaten Karangasem)
- 2. I Gusti Made Djatnika (Parisada Kabupaten Karangasem).
- 3. I Ketut Bona (Stap Kantor Sospol Kabupaten Karangasem).
- 4. Drs I Wayan Suter (Stap Kantor Departemen Agama Kabupaten Karangasem).
- 5. Drs Ida Wayan Oka Diksa (Stap Kantor Departemen Agama Kabupaten Karangasem).
- 6. I Gede Bendesa (Stap Kejaksaan Negeri Amlapura).
- 7. I Made Suprata, SH. (Ka. Sub. Bag. Perlahlum pada Bagian Hukum)
- 8. I Made Sangging (Stap POLRES Karangasem).
- 9. I Gusti Lanang Jendra (Stap Bagian Kesra Setwilda Tingkat II Karangasem.
- 10. Ida Bagus Ngurah SWD (Parisada Hindu Dharma Kabupaten Karangasem)
- 11. Ida Bagus Ketut Tantra (Stap Pengadilan Negeri Amlapura).
- 12. I Gede Semara (Ka. Sub. Bag. Dokumentasi Hukum pada Bagian Hukum)

Amlapura, 20 Agustus 1992.

Team Penyempurnaan / Peneliti Awig - awig Desa Adat Kabupaten
Daerah Tingkat II Karangasem.

K e t u a,

Sekretaris.

ttd

ttd

I WAYAN SUDIARTHA, SH.

ANAK AGUNG GEDE RAI, SH